

ARUBA TA HONRA CHARLES BROUNS CU CAYA

ORANJESTAD (AAN): Charles Brouns y seguramente "Charlie's Bar" no ta desconoci pa hopi hende na Aruba y tampoco pa e marineronan cu tabata aki durante e di dos guerra mundial, of pa e miles di turistanan cu a yega di bishita nos dushi isla.

Ken ta Charles Brouns y kico ta hacié un persona special cu awe nos ta honré cu nombramento di un caya na su number, esta Rodgerstraat.

Mas despues lo converti Grensweg den Caya Captain Robert Rodger dunando reconocemento na e figura di Robert Rodger.

Charles Brouns, mihó conoci como Charlie a nace dia 15 di december 1915, na Weert, Hulanda.

El a bandona su pais natal tempo e tabata tin 23 año en busca di un mihó porvenir. El a bai Corsow na unda e a traha mas o menos un año cu Pletterlij Nederhorst. Despuea el a bini Aruba unda el a bay traha como bartender cerca ruman di su enamora Marie In't Veld. Mientras tanto cos no tabata pinta mucho bon na Europa. Tabata tin amenaza di guerra tur parti.

Charlie a dicidi di casa pa poder p'asina e ultimo aki bin cerca dje. Desde cu Charlie a traha den un bar el a anhele di un dia por tin un

bar di su mes. El a traha duro y na 1941 su soño a bira realidad. El a habri "Charlie's Bar". Mescos cu Charlie, Marie tabata traha den e bar.

Charlie tabata conoci como cu e hopi biaha, tabata manera un tata pa nan. Si el a ripara cu un di nan tabata bebe di mas, e tabata percura pa e yega cas. Ademas e tabata un persona cu den silencio tabata yuda esnan menos afortuná y cu tabata sponsor clubnan deportivo.

Pa su aporte na e comunidad di Aruba, Charlie a ricibi un condecoracion di La Reina. Charlie tabata un negociante cu hopi curashi y vision. El a ripara cu na Aruba tabata falta un lugar unda hende por baila anochi. P'esey despues di guerra el a habri un club nocturno na San Nicolas. E club nocturno aki, "Lido" tabata situa na Grensweg. E tabata un club renombra cu a existi te ora Aruba Caribbean Hotel, actualmente Radisson Hotel a habri.

Loke ta haci Charles Brouns special ta cu e tabata un persona perseverante, cu bon curason, cu na cuminsamento di industrializacion di Aruba a cuminsa cu un negoshi na San Nicolas.

Esaki no obstante cu e tabata un homber pover cu poco educacion escolar. Charlie a

sa di haci di su negoshi un lugar di refugio pa marinieronan den tempo di guerra, tambe a sa di impone respet den su bar.

Charlie semper tambe den tempo di berans, a keda cu confianza den San Nicolas y a sigui propaganda San Nicolas.

Na 1977 Charles y Marie a pasa e bar over pa nan unico yiu Junior, y a bay goza di un pension bon mereci te na su morto na 1989.